

PWYLLGOR CYNLLUNIO	DYDDIAD: 05/11/2018
ADRODDIAD UWCH REOLWR GWASANAETH CYNLLUNIO A GWARCHOD Y CYHOEDD	CAERNARFON

Rhif: 5

Cais Rhif: C18/0640/18/LL

**Dyddiad
Cofrestru: 19/07/2018**

Math y Cais: Llawn - Cynllunio

Cymuned: Llanddeiniolen

Ward: Deiniolen

Bwriad: Newid defnydd tafarn wag yn llety gwyliau

**Lleoliad: The Bull Inn, High Street, Deiniolen, Caernarfon,
LL553HU**

**Crynodeb o'r
Argymhelliad: CANIATÁU GYDAG AMODAU**

PWYLLGOR CYNLLUNIO	DYDDIAD: 05/11/2018
ADRODDIAD UWCH REOLWR GWASANAETH CYNLLUNIO A GWARCHOD Y CYHOEDD	CAERNARFON

1. Disgrifiad:

- 1.1 Mae'r cais hwn ar gyfer trosi tafarn segur Y Bull yn Neiniolen yn llety gwyliau hunanwasanaeth gydag 8 ystafell wely. Golygai'r datblygiad cryn newid i drefniant mewnol yr adeilad ond ni fyddai newid arwyddocaol i'r edrychiad allanol. Fe drosir cyn seler y dafarn yn lle cadw beiciau ac ystafelloedd chwaraeon.
- 1.2 Dywed y Datganiad Dyluniad a Mynediad, a gyflwynwyd er cefnogi'r cais, i'r adeilad fod ar werth ond nad oedd llawer o ddiddordeb wedi bod i'w brynu at ei bwrpas awdurdodedig sef tafarn ar y llawr gwaelod a fflat, gyda chaniatâd i fod yn llety gwyliau gyda gwasanaeth, uwchben. Y bwriad felly yw trosi'r adeilad cyfan yn llety gwyliau hunangynhaliol.
- 1.3 Lleolir yr adeilad ar Stryd Fawr Deiniolen a'i diffinnir yn Bentref Gwasanaeth gan Gynllun Datblygu Lleol ar y Cyd Gwynedd a Môn.
- 1.4 Mae'r cais hwn yn ddiwygiad o gais a wrthodwyd ar sail ddirprwyedig yn gynharach eleni (C18/0382/18/LL) am y rheswm o'r niwed gweledol a fyddai wedi ei achosi gan ffenestr gromen arfaethedig a'r ffaith, oherwydd y trefniant mewnol cyfyng, na fyddai'r datblygiad yn un o "safon uchel". Yn sgil trafodaeth rhwng swyddogion a'r datblygwyr gwaredwyd a'r ffenestr gromen o'r cais cyfredol a lleihawyd dwysedd mewnol y datblygiad o 9 llofft i 8. Mae'r cynnig yn parhau i ofyn am ddefnyddio'r gofod to fel rhan o'r datblygiad ond gan ddefnyddio ffenestri to "velux" yn hytrach nag estyniad gromen.
- 1.5 Daw'r cais gerbron y Pwyllgor ar gais yr aelod lleol.

2. Polisiâu Perthnasol:

- 2.1 Mae Adran 38(6) o Ddeddf Cynllunio a Phrynu Gorfodol 2004 a pharagraff 2.1.2 Polisi Cynllunio Cymru yn pwysleisio y dylid penderfynu ceisiadau yn unol â'r Cynllun Datblygu, oni bai bod ystyriaeth faterol cynllunio yn nodi fel arall. Mae ystyriaethau cynllunio yn cynnwys Polisi Cynllunio Cenedlaethol, a'r Cynllun Datblygu Lleol.
- 2.2 Yn sgil Deddf Llesiant Cenedlaethau'r Dyfodol (Cymru) 2015 mae'n ofynnol i'r Cyngor ymgymryd â datblygu cynaliadwy yn ogystal â chymryd pob cam rhesymol wrth arfer ei swyddogaethau i gyflawni'r amcanion datblygu cynaliadwy (neu lesiant). Mae'r adroddiad hwn wedi'i baratoi gan ystyried dyletswydd y Cyngor a'r 'egwyddor datblygu gynaliadwy', fel sydd wedi'i ddatgan yn Neddf 2015, ac wrth ffurfio'r argymhelliad mae'r Cyngor wedi ceisio sicrhau bod anghenion y presennol yn cael eu diwallu heb beryglu gallu cenedlaethau'r dyfodol i ddiwallu eu hanghenion hwythau. Ystyrir na fyddai unrhyw effaith sylweddol nac annerbyniol ar gyflawni'r amcanion llesiant o ganlyniad i'r argymhelliad arfaethedig.

2.3 Cynllun Datblygu Lleol ar y Cyd Gwynedd a Môn (Gorffennaf 2017)

ISA 2 : CYFLEUSTERAU CYMUNEDOL

PS 13 : DARPARU CYFLE AR GYFER ECONOMI FFYNIANNUS

TWR 2 : LLETY GWYLIAU

PCYFF 2: MEINI PRAWF DATBLYGU

PCYFF 3: DYLUNIO A SIAPIO LLE

MAN 4 : DIOGELU SIOPAU A THAFARNDAI MEWN PENTREFI

PWYLLGOR CYNLLUNIO	DYDDIAD: 05/11/2018
ADRODDIAD UWCH REOLWR GWASANAETH CYNLLUNIO A GWARCHOD Y CYHOEDD	CAERNARFON

TRA 2: SAFONAU PARCIO
 TRA 4: RHEOLI ARDRAWIADAU CLUDIANT
 PS 19 : GWARCHOD A LLE BO'N BERTHNASOL GWELLA'R AMGYLCHEDD
 NATURIOL

2.4 **Polisiâu Cenedlaethol:**

Polisi Cynllunio Cymru, Argraffiad 9, Tachwedd 2016.

NCT6 – Cynllunio ar gyfer Cymunedau Gwledig Cynaliadwy

NCT13 – Twristiaeth

3. **Hanes Cynllunio Perthnasol:**

3.1 C18/0382/18/LL: Newid defnydd tafarn gwag yn llety gwyliau ynghyd â chreu ffenestr dormer newydd yng nghefn yr eiddo - Gwrthodwyd 11/06/18

3.2 C00A/0235/18/LL: Defnyddio'r llawr uchaf i ddarparu llety gwyliau gyda gwasanaeth – Caniatwyd 07/06/00

4. **Ymgynghoriadau**

Cyngor Cymuned/Tref: Gwrthwynebiad – ategu eu sylwadau ar y cais blaenorol nad oes digon o barcio ar gael ar gyfer datblygiad o'r maint hwn.

Uned Trafnidiaeth : Dim gwrthwynebiad
 Mae'n debyg bydd y defnydd ar raddfa debyg i'r presennol ac mae digon o barcio cyhoeddus ar gael gerllaw

Dŵr Cymru : Gofyn am amod safonol er sicrhau na fydd cynnydd mewn dŵr wyneb yn mynd i'r system garthffosiaeth

Cyfoeth Naturiol Cymru : Dim sylwadau i'w cynnig

Gwarchod y Cyhoedd : Heb eu derbyn

Ymgynghoriad
 Cyhoeddus: Rhoddwyd rhybudd ar y safle ac ymgynghorwyd gyda chymdogion. Mae'r cyfnod hysbysebu wedi dod i ben a derbyniwyd gohebiaeth yn ymateb i'r cynnig ar y seiliau cynllunio materol isod :

- Mae angen diogelu siopau a thafarndai mewn pentrefi.
- Diffyg tystiolaeth bod yr ymgeisydd wedi hysbysebu'r eiddo am bris gwerthu rhesymol am gyfnod parhaus o 12 mis.
- Diffyg tystiolaeth fod galw am lety twristiaeth yn yr ardal
- Pryder am ddiffyg llefydd parcio
- Gwrthwynebu'r estyniad gromen (*erbyn hyn wedi ei dynnu o'r cynllun*)

5. **Ystyriaethau Cynllunio Perthnasol:**

Egwyddor y datblygiad

5.1 Mae'n ofynnol gwneud penderfyniadau ar geisiadau cynllunio yn unol â'r cynllun datblygu a fabwysiadwyd, oni bai bod ystyriaethau perthnasol eraill yn nodi fel arall.

PWYLLGOR CYNLLUNIO	DYDDIAD: 05/11/2018
ADRODDIAD UWCH REOLWR GWASANAETH CYNLLUNIO A GWARCHOD Y CYHOEDD	CAERNARFON

- Cynllun Datblygu Lleol ar y Cyd Gwynedd a Môn (CDLL) yw'r 'Cynllun Datblygu' mabwysiedig ac yn yr achos yma.
- 5.2 Mae Polisi Strategol PS 13 y CDLI yn anelu tuag at hwyluso twf economaidd trwy gefnogi sawl agwedd o'r economi lleol gan gynnwys cefnogi ffyniant economaidd cymunedau gwledig trwy hwyluso twf ar raddfa briodol trwy ail-ddefnyddio adeiladau sy'n bodoli'n barod. Fe fyddai'r cynnig hwn yn ail-ddefnyddio adeilad gwledig segur ar gyfer sefydlu menter busnes ac felly mae'r cynnig yn cwrdd gydag egwyddor y polisi hwn.
- 5.3 Yn ychwanegol mae polisiau ISA 2 a MAN 4 yn ceisio amddiffyn cyfleusterau cymunedol megis tafarndai mewn pentrefi. Wedi dweud hynny, yn yr achos hwn mae'r dafarn wedi bod ar gau ers 2016 ac fe fu ar werth am dros flwyddyn (rhwng Gorffennaf 2016 a Hydref 2017) gan gael ei hysbysebu ar bris isel (£75,000). Petai'r busnes tafarn yn hyfyw fe gredir y byddai'n rhesymol disgwyl y byddai rheolwyr newydd ar gyfer y busnes wedi dod i'r amlwg yn ystod y cyfnod hwnnw. Rhaid cofio bod tafarn arall, sef "Y Wellington", o fewn 20m i'r adeilad hwn ac felly fe fyddai cyfleuster tafarn yn parhau ar y stryd fawr yng nghanol y pentref o fewn pellter cerdded rhwydd i'r un a gollir o ganiatáu'r cais hwn.
- 5.4 Ystyriaeth polisi sylfaenol arall yw Polisi TWR 2 sy'n gefnogol o ddarparu llety gwyliau newydd yn ddarostyngedig i gyfres o feini prawf. Mae'r polisi'n datgan y cefnogir datblygu llety gwyliau parhaol trwy drosi adeiladau presennol cyn belled bod cynhigion o ansawdd uchel o ran dyluniad, gosodiad ac edrychiad. Mae'r newidiadau isod wedi bod i'r cynllun hwn ers gwrthodwyd y cais ddiwethaf :
- tynnu'r ffenestr gromen bwriedig o gefn yr adeilad, a
 - lleihau dwysedd mewnol yr adeilad a fyddai erbyn hyn yn cynnwys 8 llofft ensuite
- 5.5 Yn sgil y newidiadau hyn, fe gredir bod cyfiawnhad galw'r datblygiad hwn yn un o ansawdd uchel sy'n gyson gydag amcanion Polisi TWR 2.
- 5.6 Yn ogystal â'r uchod mae pum maen prawf dan bolisi TWR 2 sy'n rhaid cwrdd â nhw. Wrth edrych ar y meini prawf hyn yn eu tro :
- i. Mae'r maen prawf cyntaf yn sôn am lety mewn adeiladau newydd ac felly nid ydyw'n berthnasol i'r achos hwn.
 - ii. Wrth ystyried bod hwn eisoes yn eiddo sylweddol ei faint a fu a defnydd blaenorol a oedd a'r potensial i greu niwsans arwyddocaol, ni chredir bod unrhyw amheuaeth y gellid trosi'r adeilad i ddefnydd o'r raddfa a fwriedir heb creu effeithiau mwy niweidiol i'r ardal o gwmpas na'r defnydd blaenorol. Fe ystyrir felly bod graddfa'r defnydd a gynhigir yn dderbyniol mewn egwyddor dan ail faen prawf y polisi hwn sy'n gofyn i raddfa'r datblygiad fod yn briodol ar gyfer y safle.
 - iii. Mae'r maen prawf hwn yn gofyn sicrhau na fydd colled yn y stoc dai parhaol yn deillio o'r datblygiad. Wrth dderbyn bod llawr uchaf yr adeilad ar gael fel fflat ar gyfer rheolwr y dafarn, fe ystyrir fod fflat o'r fath yn rhan annatod o'r busnes ac na fyddai ei golli'n cael unrhyw effaith ar y stoc dai parhaol sydd ar gael i'r gymuned leol.
 - iv. Mae'r maen prawf hwn yn gofyn sicrhau na fydd niwed sylweddol i gymeriad preswyl ardal. Mae'r safle hwn mewn ardal sy'n breswyl yn bennaf ond ni ystyrir y byddai datblygiad o'r raddfa hon yn creu niwed arwyddocaol i gymeriad preswyl yr ardal, yn wir, fe fyddai'r defnydd newydd yn fwy "anheddol" ei naws na defnydd fel tafarn.

PWYLLGOR CYNLLUNIO	DYDDIAD: 05/11/2018
ADRODDIAD UWCH REOLWR GWASANAETH CYNLLUNIO A GWARCHOD Y CYHOEDD	CAERNARFON

v. Mae'r maen prawf hwn yn gofyn sicrhau nad yw'r datblygiad yn arwain at ormodedd o lety o'r fath yn yr ardal. Nid oes unrhyw dystiolaeth bod gormoddedd o lety gwyliau yn ardal Deiniolen.

5.7 Wrth ystyried y dadansoddiad uchod fe gredir bod y datblygiad yn cwrdd gyda gofynion Polisi TWR 2 y CDLI.

Mwynderau cyffredinol a phreswyl

5.8 Yn gyffredinol, mae polisïau PCYFF 2 a PCYFF 3 y Cynllun Datblygu Lleol ar y Cyd yn caniatáu cynigion ar gyfer datblygiadau newydd cyn belled na fyddent yn cael effaith niweidiol ar iechyd, diogelwch neu fwynderau meddianwyr eiddo lleol neu ar yr ardal yn gyffredinol. Yn ogystal gofynnir bod datblygiadau'n:

- Ychwanegu at, a gwella, cymeriad ac ymddangosiad y safle ac yn
- Parchu'r safle a'i gyffiniau o ran ei le yn y dirwedd leol.

5.9 Yn sgil tynnu'r ffenestr gromen o'r datblygiad ychydig iawn fyddai'r newid allanol i'r adeilad ond am osod ffenestri "velux" yn y to. Yn ogystal, fe gredir fod y potensial i greu niwed mwynderol megis sŵn ac ymyrraeth yn fwy tebygol o'r defnydd awdurdodedig, megis tafarn, nag y byddai o ddefnydd llety gwyliau hunangynhaliol fel y cynhigir yma.

5.10 Wedi ystyried y drafodaeth uchod, ni chredir bydd y datblygiad arfaethedig yn achosi niwed arwyddocaol i fwynderau cymdogion o'i gymharu â'r defnydd awdurdodedig ac felly mae'r cynnig yn cwrdd gyda gofynion Polisi PCYFF 2 a PCYFF 3 y CDLI.

Materion trafndiaeth a mynediad

5.11 Ni chododd yr Uned Trafndiaeth unrhyw wrthwynebiad i'r bwriad ond fe dderbyniwyd gwrthwynebiad yn honni bod diffyg llefydd parcio'n lleol. Er gwaethaf hynny, wrth ystyried defnydd awdurdodedig yr adeilad fel tafarn, ni chredir y byddai'r datblygiad hwn yn debygol o achosi trafferthion sylweddol gwaeth na'r sefyllfa awdurdodedig. Datgan yr Uned Trafndiaeth bod parcio cyhoeddus ar gael mewn meysydd parcio ac ar y stryd o fewn pellter rhesymol i'r cyfleuster. Fe gredir felly bod y cynnig yn dderbyniol dan bolisïau TRA 2 a TRA 4 y CDLI sy'n ymwneud â sicrhau bod datblygiadau'n cwrdd â safonau parcio'r cyngor ac na fyddai niwed i ddiogelwch y briffordd.

6. Casgliadau:

6.1 Fe ystyrir y byddai'r datblygiad o lety gwyliau hunangynhaliol yn yr adeilad hwn yn dderbyniol o safbwynt y polisïau perthnasol a nodir uchod ac ni ystyrir y byddai'n cael effaith niweidiol andwyol arwyddocaol ar fwynderau'r ardal na'r trigolion cyfagos. Yn ogystal, ystyrir bod lleoliad, dyluniad, gorffeniad a ffurf y datblygiad yn dderbyniol ac yn cydweddu â chyd-destun ei leoliad. Wedi rhoi ystyriaeth lawn i'r holl faterion cynllunio perthnasol, ynghyd â'r holl faterion a godwyd gan wrthwynebwyr, fe ystyrir fod y datblygiad yn addas ar gyfer y safle a'i fod yn cydymffurfio gyda'r polisïau a chanllawiau lleol a chenedlaethol a nodir.

7. Argymhelliad:

Caniatáu – amodau

1. 5 mlynedd

PWYLLGOR CYNLLUNIO	DYDDIAD: 05/11/2018
ADRODDIAD UWCH REOLWR GWASANAETH CYNLLUNIO A GWARCHOD Y CYHOEDD	CAERNARFON

2. Gwaith yn unol â'r cynlluniau
 3. Amod defnydd gwyliau yn unig
 4. Amod Dŵr Cymru
- Nodyn : Dŵr Cymru